

**МОНГОЛ УЛСАД ФРАНЦЫН ХӨГЖЛИЙН АГЕНТЛАГИЙГ ҮҮСГЭН БАЙГУУЛАХ,
ҮЙЛ АЖИЛЛАГААГ НЬ ЗОХИЦУУЛАХ ТУХАЙ МОНГОЛ УЛСЫН ЗАСГИЙН ГАЗАР,
БҮГД НАЙРАМДАХ ФРАНЦ УЛСЫН ЗАСГИЙН ГАЗАР ХООРОНДЫН
ХЭЛЭЛЦЭЭРИЙГ СОЁРХОН БАТАЛСНААР МОНГОЛ УЛСАД ҮЗҮҮЛЭХ ҮР НӨЛӨӨ,
ҮР ДАГАВРЫН ТАЛААРХ ДҮН ШИНЖИЛГЭЭ**

Нэг. Эерэг үр нөлөөний талаар

1.1.Эрх зүйн үр нөлөө:

- Францын хөгжлийн агентлаг нь Бүгд Найрамдах Франц Улсын Засгийн газрын харьяанд хөгжлийн албан ёсны тусламжийн бодлогыг хэрэгжүүлдэг байгууллага бөгөөд Монгол Улсад байнгын төлөөлөгчийн газартай болж, албан ёсны олон улсын эрх зүйн статус бүхий хамтын ажиллагааны үндэс бүрдэнэ.
- Хоёр тал урт хугацаанд тогтвортой хамтран ажиллахад дэмжлэг үзүүлэх эрх зүйн зохицуулалт бүрдэх бөгөөд Францын хөгжлийн агентлагаар дамжуулан үзүүлэх Францын Засгийн газрын санхүүгийн болон техникийн туслалцааг шууд, харилцан уялдаатай хэрэгжүүлэх боломж бүрдэнэ. Мөн төсөл, арга хэмжээний санхүүжилтийн гэрээг хэрэгжүүлэх эрх зүйн орчин тодорхой болж, ил тод байдал, хяналт сайжирна.

1.2.Санхүү, эдийн засгийн үр нөлөө:

- Монгол Улсад Францын хөгжлийн агентлагийн хөнгөлөлттэй зээл, буцалтгүй тусламж, техникийн туслалцаа болон хувийн хэвшлийн санхүүжилт нэмэгдэж, тэргүүлэх ач холбогдол бүхий төсөл, арга хэмжээг хэрэгжүүлэхэд санхүүжилтийн боломж өргөжнө. Тухайлбал, эхний жилүүдэд тус агентлаг жил бүр 50.0 сая еврогийн санхүүжилтийн эх үүсвэрийг манай улсын тэргүүлэх салбаруудад хуваарилахад бэлэн байгаагаа илэрхийлсэн бөгөөд энэ нь улсын төсвийн дарамтыг бууруулах, урт хугацааны хөгжлийн төслүүдийг санхүүжүүлэх эх үүсвэрийг нэмэгдүүлэх ач холбогдолтой.
- Францын хөгжлийн агентлагаас үзүүлэх санхүүжилтийн хэлбэр нь 5-20 жилийн хугацаатай хөнгөлөлттэй зээлийн эх үүсвэр, техникийн туслалцаа, буцалтгүй тусламж, хувийн хэвшлийн хөрөнгө оруулалт, түүнчлэн холимог санхүүжилт зэрэг олон төрөлтэй байна.
- Төлөөлөгчийн газар байгуулагдсанаар Францын хөгжлийн агентлагийн ажилтнууд Монгол Улсад байршин ажиллах нөхцөл бүрдэх бөгөөд энэ нь төслийн хэрэгжилтийг шууд хянан дэмжих, хугацаанд нь гүйцэтгэх боломжийг нэмэгдүүлж, хөрөнгө оруулалтын үр ашигт эерэг нөлөө үзүүлэх чухал хүчин зүйл болно.
- Хувийн хэвшлийн санхүүжилтийн урсгал, хүртээмж нэмэгдэх нь дотоодын санхүүгийн зах зээлийг идэвхжүүлж, ажлын байр бий болгох, эдийн засгийн өсөлтийг дэмжихэд эерэг нөлөө үзүүлнэ.

1.3.Институтийн болон хамтын ажиллагааны үр нөлөө:

- Францын хөгжлийн агентлаг Монгол Улсад байнгын ажиллагаатай байснаар байгууллагын бодлого, хөтөлбөр, санхүүжилтийн механизмыг илүү үр дүнтэй, уялдаатай, шуурхай хэрэгжүүлэх боломж бүрдэнэ.
- Францын хөгжлийн агентлагийн техникийн туслалцааны хүрээнд улсын хэмжээнд төрийн байгууллагуудын чадавхыг бэхжүүлэх, бодлогын зөвлөмж боловсруулах, сургалт зохион байгуулах, мониторинг, үнэлгээний тогтолцоог боловсронгуй болгох боломж нэмэгдэнэ. Улмаар Монгол Улсын урт, дунд, богино хугацааны хөгжлийн бодлого төлөвлөлтөд эергээр нөлөөлнө.

1.4.Олон улсын хамтын ажиллагааны үр нөлөө:

- Бүгд Найрамдах Франц Улстай хөгжлийн түншлэлийн хамтын ажиллагааг гүнзгийрүүлэх нь Монгол Улсын гуравдагч хөршийн бодлогыг эдийн засгийн агуулгаар баяжуулан хөгжүүлж, Европын Холбоо болон олон улс, бүс нутгийн түвшний манлайлал, хамтын ажиллагаа бэхэжнэ.
- Францын хөгжлийн агентлаг нь олон улс, бүс нутгийн хэмжээнд үйл ажиллагаа явуулдаг хөгжлийн мандаттай байгууллага тул бусад түншүүдтэй хамтран Монгол Улсын хөгжлийн бодлогын хэрэгжилтэд илүү идэвхтэй, үр дүнтэй дэмжлэг үзүүлэх боломж бүрдэнэ. Ялангуяа Монгол Улс дахь бусад хөгжлийн түншүүдтэй хамтарсан болон холимог санхүүжилттэй (blended finance) хөгжлийн томоохон төслүүдийг хэрэгжүүлэх катализатор болно.
- Францын хөгжлийн агентлагийн тэргүүлэх чиглэл нь уур амьсгалын өөрчлөлт, эрчим хүчний шилжилт, тогтвортой дэд бүтэц, орон нутгийн хөгжил, ойн аж ахуй, хөдөө аж ахуйн салбар зэрэг байдаг тул Монгол Улсын олон улсын өмнө хүлээсэн уур амьсгалын өөрчлөлтийн эсрэг амлалт, үндэсний хэмжээний ногоон хөгжлийн бодлогыг бодитоор хэрэгжүүлэхэд олон улсын чухал тулгуур түнш болох юм.

1.5.Нийгэм, орон нутгийн үр нөлөө:

- Тус агентлагийн санхүүжилт нь хотжилтын тулгамдсан асуудлыг шийдвэрлэхээс гадна орон нутгийн тогтвортой хөгжил, мал аж ахуй, газар тариалан, ойн аж ахуйн салбарт чиглэдэг. Энэ хүрээнд малчид, тариаланчид, жижиг, дунд үйлдвэрлэл эрхлэгчдэд зориулсан хөнгөлөлттэй зээл, инновацын шийдэл бүхий төслүүд нэмэгдэнэ.
- Зорилтот бүлгүүд, эмэгтэйчүүдийн бизнес болон байгаль орчинд ээлтэй үйлдвэрлэлийг дэмжсэн хөтөлбөрүүд нэмэгдсэнээр орон нутгийн хөгжлийн тэгш бус байдал багасаж, ядуурлыг бууруулах, нийгмийн хүртээмжтэй хөгжлийг хангах бодит үр нөлөө тусна.

Хоёр. Дүгнэлт

Монгол Улсад Францын хөгжлийн агентлагийг үүсгэн байгуулах, үйл ажиллагааг нь зохицуулах тухай хэлэлцээрийг соёрхон батлах нь Монгол Улсын тогтвортой хөгжлийн зорилтыг биелүүлэх, ялангуяа нийгэм, эдийн засгийн үр ашиг бүхий хөгжлийн төслүүдийг хэрэгжүүлэх, хувийн хэвшлийн санхүүжилт, хөрөнгө оруулалтыг нэмэгдүүлэхэд хувь нэмэр оруулах чухал алхам болох юм.

Хэлэлцээр соёрхон батлагдсанаар:

1. Хоёр улсын Засгийн газар хоорондын харилцаа олон улсын гэрээний дагуу баталгаажиж, цаашдын төсөл, арга хэмжээг тогтвортой, шуурхай хэрэгжүүлэх эрх зүйн орчин бүрдэнэ.
2. Францын хөгжлийн агентлаг болон түүний харьяа байгууллагуудын урт хугацааны, уян хатан санхүүжилтийн эх үүсвэр нэмэгдэнэ.
3. Францын хөгжлийн агентлаг суурин төлөөлөгчийн газраараа дамжуулан төсөл, арга хэмжээний гүйцэтгэлд тогтмол хяналт тавьж, удирдлагаар хангах тул санхүүжилтийн ашиглалт, ил тод байдал болон төслийн үр өгөөж сайжирна.
4. Мал аж ахуй, газар тариалан, уур амьсгалын өөрчлөлтөд тэсвэртэй байдлыг хангах чиглэлээр инновац шингэсэн төслүүд хэрэгжиж, орон нутгийн иргэдийн амьжиргааг дээшлүүлэн, бүс нутгийн тэнцвэртэй хөгжлийг хангана.
5. Хувийн хэвшлийн санхүүжилтийн боломж, хөрөнгө оруулалтын урсгалыг нэмэгдүүлнэ.

---o0o---